

112 年高師大附中客語朗讀文章國小學生組（四縣腔）

【另外一種煩愁】劉玉蕉原作

千盼萬望，阿姆應①佢咧！

牽等新自行車，佢胸挺挺、鼻臄臄仔想愛一路颯轉去，阿爸知佢奈毋何，細聲咄佢講：「毋識騎過，毋驚死就做你騎講。」佢鼻公摸啊，睇一下脣口老妹該臺矮佢个四輪仔自行車，「哼！」佢風神轟天，看等面前金皙皙②緊同佢攞手个自行車，想講：「大地，乜毋係無半點好空啦！」毋過，風神過後，對自家像嘮風樣仔抽長个身體，佢還係試著已闕，闕到會死！

「阿伯婆，若孫仔身高超過標準，愛打全票吔！」阿婆好帶佢出門遶寮、看電影，這恁久，輒輒堵著共樣个问题，阿婆敗勢，佢乜感覺已無面子，淨加幾公分仔定定就愛使加一倍个錢，實在無道理。

「手腳輕兜仔，莫一日到暗挨著神打著佛！」阿婆唸佢、阿姆哆佢。實在冤枉，屋下就恁大仔定定，佢既經當忍耐毋敢拍球仔咧，還係不時毋係撥著東西，就係踢著凳腳，毋係挑事，

---

① 應：音 in ˋ；允諾、准許。

② 金皙皙：音 gim ˊ xi xi；亮晶晶。

嘎分人誤會講賤手賤腳，唉，頭那還痛哦！總講啊，佢手長腳長哩，坐等，人嫌霸位；企等，人嫌礙眼就著吔啦！

「生來恁高恁大咧，毋加減搵手兜仔咩！」看，阿姆个箭又射過來哩啲！拜託欸，鄰舍、阿爸、阿婆哪個毋係阿腦佢乖、肯搵手？比得老妹，該斯天爭地哦！尤其係堵著大拚掃時節，阿爸个事頭，佢貌有三股一恁多，恁樣个佢，在屋下還係分人嫌到無一坵好，正經無天理。

手長腳長在屋下有恁仔个待遇，在學校有較得無？無，人講：「天塌落來有高个人撐等。」無毋著，先生講臺一企，目珠看啊去，堵堵到後排，變把戲都毋得！運動會時節，大家認為若腳較長，跳高、跳遠定著打有名，麼人知悽慘到愛先生來安慰，走相逐總看得哪，還見笑，聽過自家會徑自家無？該就係佢啦！在運動坪項跌到狗食屎，搵到大家哈哈笑，臨尾校長賞佢運動精神獎，這補償對佢來講已實在，承蒙佢！

雖然高長大漢帶分佢一時个毋慣同煩愁，毋過，佢相信毋慣過後，佢會體會著成長个快樂。煩愁个正面係阿腦佢知人我，先生个目珠督等，佢毋敢狡怪，成績就恁樣日日進步。